

# PAOT TE TĪMŌN PU TAPPET KAX'ĀMI II

**1** <sup>1</sup>Ūgmūn Paot. 'Āte xa' kax'āmi nūhū' tappet. Topa te mōgkutnāhā 'ūgmūn, tu Yeyox Kunnix yōg mōkpok xop kopak xix. Yā Topa tep-tup. Tute mōgkutnāhā, 'ūyiy hi'ax kux 'ohnāg 'āktux, yā yūmū yōg hi'ax Yeyox Kunnix mūtik hi'ax kux 'ohnāg. Yā hōmā Topa te yūmū'ā hām'āktux xex, nūy yūmū'ā hi'ax kux 'ohnāg hōm, yā yūmūg hi xe'ēgnāg mōkumak mōg, ha' kux 'ohnāg. <sup>2</sup>'Āte xa' kax'āmi!, yā Tīmōn pu! 'Āmūn 'ūgkutok pīt putuk Topa yōg putat kopah. Pu yā Topa xix yūmūg xuxyā Yeyox Kunnix xa hāmmaxnā, nūy 'ākuxa ka', xayīy 'ākuxa mām.

## 'Āpu nō hāpxop max pēnā max

<sup>3</sup>'Āte Topa pu hām'āktux, hu: "Āmax, puxi! 'Ūmax hāpxop xohix." Kaxīy. 'Āte Topa pu hāpxopmā max, tuk kuxa max, yāg xape xop hittap putuk. 'Āte 'āxutigāhā, yā Topa pu hām'āktux 'āmnīy 'ihā xix hāptup 'ihā!, yā Topa pu hām'āktux, hu: "Āmax. Puxi!" Kaxīy. Tu Topa pu 'āmūn 'āktux. <sup>4</sup>Hōmā 'āpotaha, ha 'āte 'āpota xutigāhā, tup-tup xexka!, nūy yāy tu 'āmōxān, nūy 'ūgkuxa hittupmā! <sup>5</sup>'Ākuxa yūm ka'ok Topa kopah, ha 'āte 'ākuxa yūm ka'ok xe'e pekpaxex, yā 'āxukux Nox kuxa yūm ka'ok putuk, xix 'ātut 'Ēnnīy putuk. 'Āte' yūmmūg, 'ūkuxa mām, yā 'āmūn putuk. <sup>6</sup>'Ākuxa yūm. 'Āpu hāpxopmā xe'ēgnāg. Hōmā Topa te 'āka'ogāhā, xayīy Topa pu hāpxopmā max, 'ihā 'āte 'āyīmūg yāy yūm xex. 'Āpu hāpxopmā punethok nō'om. <sup>7</sup>Hamūn. Topa te yūmū'ā Topa Koxuk hōm. 'Ok Topa Koxuk te yūmūg pu'ugāhā xix yīpkutugāhā? 'Āmhok. Topa Koxuk te yūmūg ka'ogāhā, 'ūyiy xohix putup pax, tu yūmū'āte yāy yōg hāpkummuk mīy'ax mō'nīy.

<sup>8</sup>'Āpu yūmūg xuxyā Yeyox Kunnix 'āktux, nūy Yeyox hā yāyhāhup hok xik-mūn hā yāyhāhup hok kamah, 'ūgmūn yā Topa yōg kāmānat. 'Āpu hāpkummuk hā tot, nūy tikmū'ūn pu Yeyox 'āktux, ha Topa te 'āka'ogāp-tup. <sup>9</sup>Topa te yūmūg kuxa kummuk xit, nūy kuxa max mō'tat, 'ūyānān tu!, ha yūmū'āte yāyhā Topa yōg tikmū'ūn. 'Ok yūmū'āte hāpxopmā max, yīy Topa te yūmūg kuxa kummuk tupmāhā!, puyīy kuxa tu' max? 'Āmhok. Pa Topa tep-tup, yā 'ūhok mīy putup, hu yūmūg kuxa kummuk xit. Hōmā' xip'ah hām xexka!, 'ihā Topa te yūmū'ā nō hāpxop hok hōm, yā yūmū'ā Yeyox Kunnix hok hōm, ha' pīp hāpxop max yūmū yōg Yeyox mūtik. <sup>10</sup>Ha ta' nūn Yeyox

Kunnix. Ha ta hōnhā' pip nōm hāpxop max yūmū yōg Yeyox mūtik. Yeyox Kunnix te yūmūg kuxa kummuk xit. Yeyox te xakix'ax nōā', tu tikmū'ūn pu hām'āpak max 'āktux, yā tikmū'ūn pu hi'ax kux 'ohnāg hōm putup.

<sup>11</sup>Topa te mōgkutnāhā 'ūgmūn, 'ūyiy hām'āpak max 'āktux, 'ūyiy tikmū'ūn pu hāmyūmmūgā'. <sup>12</sup>'Āte hām'āpak max 'āktux, yiy ta' nōy tek kutex kummuk, yīk xūy nūnteh. Pa yā 'āte yāyhāhup'ah. 'Āte Topa yūmmūg, tuk kuxa yūm Topa kopah. 'Āte Topa pu popmāhā hāpxop xohix, ha tute nō hāpxop pēnāp-tup nōm hāptup 'ihā. Yā hāptup mō'nāp-tup, ha Topa te tikmū'ūn yōg hāpxopmā'ax kopit putup, 'ok pe max, 'ok pe kummuk. 'Āte' yūmmūg.

<sup>13</sup>Hōmā 'āte xa' yūmmūgāhā hāpxopmā xohix xe'e!. 'Āpu, nō kopa 'ākuxa yūm mōkuma mōg. 'Āpu tikmū'ūn putup pax mōkuma mōg. Yā' pop nō hāpxop yūmū yōg Yeyox Kunnix mūtik. <sup>14</sup>Yā xa' popmāhā hāpxop max xohix. Topa Koxuk xip yūmūg kopah. 'Āpu nō hāpxop max pēnā', 'ihā Topa Koxuk te xa hā tu tehe'. <sup>15</sup>Xate' yūmmūg, hāpxexka 'Ax yōg tikmū'ūn xohix tek nīm, xix Piy xix 'Ehmōg tek nīm kamah. <sup>16</sup>Puyā Topa 'Ōnēxip xuxyā xop kuxa ka', nūy nōm pu hāpxopmā max. Hamūn, 'Ōnēxip tek kuxa hittupmāhā punethok. 'Ūkxip kanet ka'ok kopah, pa 'Ōnēxip te 'ā tu yāyhāhup 'ohnāg. <sup>17</sup>Ūnūn tu nūktu kōmēn Hōm tu' xupep tuk xak, tuk xak, tu nūktuk xipihi!. <sup>18</sup>Pu yā Topa 'Ōnēxip kuxa ka' nō hāptup 'ihā Kunnix te putpu' nūn. Yā 'Ōnēxip te 'ūgmūg hā tu tehe' punethok kōmēn 'Ep tu'. Xate' yūmmūg.

### Xonat max putuk Yeyox Kunnix yōg

**2** <sup>1</sup>Xōnnē, 'ākuxa yūm Yeyox Kunnix kopah, tu nūmūtik 'āxip. Tute xa hok hāpxopmāhā'. 'Ūmax, pu Yeyox 'āka'ogā'. <sup>2</sup>Xate yōg hām'āktux 'āpak tikmū'ūn xohix mūtik. 'Āpu tik max xop pu' yūmmūgā nōm hām'āktux, puyiy nōm hā tikmū'ūn xohix pu' yūmmūgā'.

<sup>3</sup>'Āpu kummuk hā tot, Yeyox Kunnix yōg xonat max putuk. <sup>4</sup>Xonat max te hāpxopmā' puyiy 'ūyōg kapitām tu hittup. Xonat max te hāpxopmā te xonat xop kūnāpa xop hāpxopmā putuk 'ohnāg. <sup>5</sup>Ha ta mō'motyōn yūmmūg xop te pēnā'ax 'āpak 'ohnāg, puxix mūn xut 'ohnāg. <sup>6</sup>Ha ta tik 'ūm te hām xa ka'ok, puxix hāpxop xohix yīkūy. <sup>7</sup>'Āpu yōg hām'āktux pe'āpaxeh, ha ta yūmūg xuxyā Yeyox Kunnix te xa' yūmmūgāp-tup hāpxop xohix.

<sup>8</sup>'Āpu Yeyox Kunnix pe'āpaxeh, yā Namix hā mōkputox, yā' xok tāmnāg, pa yā putpu' hi!. 'Āte nōm hām'āpak max 'āktux. <sup>9</sup>Yā 'āte Yeyox yōg hām'āpak max 'āktux, yiy ta tikmū'ūn te kanet ka'ok kopak xix, tuk yīm kiy xik kup kiy pipkup māxrap hā, yā xupxet putuk, pe' nōy kix xop putuk. Pa tikmū'ūn te Yeyox yōg hām'āpak max'ax hiy 'ohnāg pipkup māxrap hā. <sup>10</sup>'Āte' kummuk xohix hā tot Kunnix kopa kuxa mām xop pu', yā Topa te nōm yīmōgātux, puyiy nō kuxa mām Yeyox Kunnix kopah, puyiy Topa nō kuxa kummuk xit, puyiy pēnā hāpxop xohix max xe'ēnāg hāmyāxatamuk xohix kux 'ohnāg hā.

<sup>11</sup>Hām'āktux xe'e hu:

“Yūmūg xakix Kunnix mūtik, koxix ti Yeyox mūtik.

12 Yümũ'áte kummugã hã tot Kunnix mütik, kopxix yümüg tikmũ'ün xat putup Kunnix mütik.

Paxpu yümũ'áte nõy pu' xuktux Kunnix yümmüg 'ohnãg, ha ta Kunnix te' xuktux putup yümüg yümmüg 'ohnãg.

13 Paxpu yümũ'áte Kunnix tu pip ka'ok 'ohnãg, puxix Yeyox yümüg tu' xip ka'ok. Yã Kunnix te kaxiy, tu hãpxop nõy mĩy'ah."

Kaxiy.

### Kãmãnat max

14'Àpu tikmũ'ün yümmügã nũhũ'. 'Àpu tikmũ'ün yümmügã Topa keppa hã kaxiy, hu: "Pa 'ätix. Yãy mãnõg hok. Yãy kix hok." Kaxiy. Hamün, 'üyãy mãnõg, puxix hãpkummugã', yã' xupak xop koxyõy. 15'Àpu hãpxopmã max, puyiy Topa 'õg hãpxopmã'ax putup pax xayiy 'õg hãpxopmã'ax hã yãyhãhup hok. 'Àpu Topa hãm'apak max yümmügã max. 16'Àpu hãm'aktux hitop 'apak hok, 'ap Topa yõg hãm'aktux'ah. Nõm hãm'aktux hitop te tikmũ'ün papuk, pu Topa nãpa mõg. 17Kayax te yin mãhã'. Hã kaxiy nõm hãm'aktux te hãpkummugãhã', yã hãm'aktux te 'Ìmënem yõg hãmaktux putuk, xix Pinet yõg putuk. 18Nõm te Topa yõg putat max xak, nüy Kunnix kopa kuxa mãm xop kuxa mãm'ax koxyõy. Nõm te' yümmügãhã, hu: "Hõmã xakix xop yin putpu' hi'." Kaxiy. Pa yã' koit. 'Ûputpu' hi'ah hõmã, pa' putpu' hip-tup. 19Pa Topa 'ũka'ok, xix Topa yõg tikmũ'ün 'ũka'ok, yã mĩptut mĩm mãykup ka'ok putuk, ha Topa te nõ mĩm mãykup yimũ kax'ãmi hu: "Topa te yãy yõg tikmũ'ün yümmüg." Kaxiy. Tu xe: "Kunnix kopa kuxa mãm xop, 'ãpu hãm'kummuk mĩy'ax nĩm!" Kaxiy.

20Mĩptut max xexka kopa' pip kãnãypetxax max xix kanenãm max. Yã' pipkup yãnãm 'ãtã yixux hã' mĩy xix yãnãm ponnok hã' mĩy. Yã 'ãmuk xexka pu' max. Ha ta' pip kama nõm nõy kummuk, yã mĩm hã' mĩy xix putõy hã' mĩy. Yã 'ãmuk pu'. 21Tikmũ'ün te hãpkummuk mĩy'ax xohix kux, puxix kãnãypetxax max putuk xix kanenãm max putuk. Topa te nõm hã hãpxopmã max, yã Topa xexka yõg tikmũ'ün, yã' max Topa pu', yã' max mõkuma' mõg hãpxopmã max xohix pu'. 22'Àpu tuktup xop yõg hãpkummuk mĩy'ax kux. 'Àpu hãpxopmã yok, nüy 'ãkuxa mãm ka'ok, nüy xohix putup pax, nüy yãy kix hok. 'Àpu nõm mĩy 'ũkuxa tup xop mütik, yã Topa tu' kax xop mütik. 23Tikmũ'ün te hãm'aktux hitop, tu hãm'yümmüg 'ohnãg. Hãpxopmã hã kaxiy hok 'ãmün. Hãpxip 'ihã tikmũ'ün te yãy mãnõg xexkap-tup, tu yãy kix-tup. 24Pa Topa yõg kãmãnat te kaxiy'ah, yã yãy mãnõg'ah, pa' xohix pu' max, tu' nõy pu hãm'yümmügã max, tu' nõy yõg hãpkummuk mĩy'ax hã' tot. 25tu' nõy yõg hãpkummuk kohe' mĩy'ax yoa', 'ihã' gãy 'ohnãg, yiy ta Topa tep-tup nüy kuxa max popmã'. Topa tep-tup, pu tikmũ'ün yãyhãhup, nüy hãpkummuk mĩy'ax kux, nüy hãm'yok yümmüg, 26tu Hãm'gãyãgnãg yõg pamãg putuk kopa mõxaha'. Hamün, hõmã Hãm'gãyãgnãg te nõm müg, tu nõm xat pax, yã pãmãg putuk.

### Hãm xexka yõg hãmyãxatamuk xohix xox putox

**3** <sup>1</sup>Hãmyũmmũg nũhũ!. Hãm xexka yõg hãmyãxatamuk xohix xox putox 'ihã tikmũ'ũn pu hãpkummugãp-tup. <sup>2</sup>Hamũn. Tikmũ'ũn te yã putup pax putup, tu tayũmak putup, tu yã xexka pe'paxex putup, tu xuxet'ax kummuk 'ãktux putup, 'ap 'atak 'ãpak putup'ah, xix' tut 'ãpak putup'ah, tu' xuktux putup'ah hu: "Puxi'. Topa, 'ãmax." Kaxiy. Tu Topa putuk 'ohnãg putup, <sup>3</sup>tu' nõy putup nõg putup, 'a' yã kix kux putup'ah, tu' nõy kupex putup, tu yã yõg hãpkummuk miy'ax putup xüy kuxyãp-tup'ah, tu' gãy putup, tu hãpxopmã max putup nõg putup, <sup>4</sup>tu' gãy xop mõgãp-tup, puyiy yã xape xüygã', tu' pa te hãmyũmmũg 'ohnãg putup, tu yã xexka pe'paxex putup, tu' yã pu hãpxop max xohix xak putup, pa Topa xak 'ohnãg, <sup>5</sup>tu Kunnix kopa kuxa mãm xop putuk putup, pa yã 'ap-tup'ah, puyiy Topa hãpxopmã max nõm kopah, yã' kuxa kopah. 'Äpu nõm tikmũ'ũn pe mõg hok. <sup>6</sup>Nõm tikmũ'ũn kopa' pip nõm te' nõy yõg xuxyã xop hã mõ'xaha', kokex putuk, tu 'ũn mõgãhã', ha 'ũn te' pe' mõg, yã 'ũn te hãmyok yũmmũg kutõgnãg, tu' koit 'ãpak pax, tu hãpxop kummuk miy pax, 'ũp-tup pax hãpxop kummuk, tu' pe' mõg. <sup>7</sup>Tu tikmũ'ũn xohix yõg hãmyũmmũg 'ãpak, pa hãmyũmmũg xe'e' ohnãg. <sup>8</sup>Hamũn, Yãn xix Yãm putuk. Hõmã nõm te Mõyyex putup nõg. Hã kaxiy kama hõnhã nõm te hãmyũmmũg xe'ep-tup nõg. Yã 'ũp-tox kummuk, tu' yõg putahat 'ap Topa yõg putat xe'e'ah. <sup>9</sup>Pa yã hãptox ha' mõg putup'ah. Hãpxip 'ihã tikmũ'ũn xohix te' yũmmũg putup, nõm yõg hãmyũmmũg 'ap xe'e'ah. Hamũn, Yãn xix Yãm putuk.

### 'Äpu hãmyũmmũg max

<sup>10</sup>Pa xate yõg hãmyũmmũg 'ãpak, tu yõg hãpxopmã'ax pãnãhã', tu' yũmmũg yõg putahat, nõm 'ãtep-tup, tu' kuxa yũm'ax yũmmũg. 'Äte nõm hãpxopmã kux'ah, ha xate' pãnãhã'. 'Äte xohix putup pax, ha xate' yũmmũg. 'Äte Topa yõg putat xak 'ohnãg, ha xate' yũmmũg. <sup>11</sup>Tikmũ'ũn tek kute'ex kummuk kãmãn 'Ätikit tu' xix kãmãn 'Ikõn tu' xix kãmãn Nixtat tu', yik xüy, ha xate' yũmmũg. 'Äte' kummuk hã tot, pa Topa te' xüy nõã', ha tak mõg. <sup>12</sup>Tikmũ'ũn max tep-tup, nõy hãpxopmã max Yeyox Kunnix mütik, yã Topa putuk, tu nõm xohix xexka te' xüy hã tot putup, yã tikmũ'ũn nõy te nõm xohix xexka kute'ex kummuk putup. <sup>13</sup>Yã kummuk xop kummuk nõynã' mõg putup, xix Kunnix kopa kuxa mãm te' koit xop kummuk nõynã' mõg putup. Nõm te' koit, ha tikmũ'ũn kuxa mãm koit kopah, ha nõm kuxa mãm yã yõg koit kopa kamah. <sup>14</sup>Pa 'ãmũn kaxiy'ah. 'Äpu nox xhip hãmyũmmũg kopah, yã xa nõm yũmmũgãhã'. Yã 'ãkuxa yũm, nõm kopah. Xate' yũmmũg nõm te xa' yũmmũgãhã'. <sup>15</sup>Hõmã 'ãmũn kaxop xix hõnhã 'ihã' yũmmũg Topa tappet xe'e'. Topa tappet te xa' yũmmũgãhã', Yeyox te 'ãkuxa kummuk xit, nõy kaxa max mõ'tat, 'üyãnãn tu', ihã 'ãkuxa yũm Yeyox Kunnix kopah. <sup>16</sup>Topa te kax'ãmigãhã hãpxop xohix xexka Topa yõg tappet tu', yã Topa yõg hãm'ãktux xohix xexkah. Topa yõg tappet te' yũmmũgã

max, tu tikmũ'ün yōg hāpkummuk mīy'ax mǎnōg, tu hāpxopmǎ kohe yoa', tu hāpxopmǎ yok yūmmūgāhā', <sup>17</sup>puyīy Topa yōg tikmũ'ün yāyhā tu' ka'ok, tu hāpxopmǎ max xohix yūmmūg, nūy hāpxopmǎ max xohix.

**4** <sup>1</sup>Āte xa hām'aktux, ha Topa te' xupak xix Yeyox Kunnix te'. Yeyox Kunnix te' kopit putup tikmũ'ün xohix xexka yōg hāpxopmǎ'ax, yā hi xop yōg hāpxopmǎ'ax kopit putup xix xakix xop yōg, tu' max mō'pot xix' kummuk, 'ihā putpu' nūn putup Kunnix, yā' xip yūmūg xuxyā Yeyox Kunnix, tu' xat, yāy yōg tikmũ'ün. <sup>2</sup>Āte xa hām'aktux, 'āpu Topa hām'āpak max 'aktux mōkuma mōg 'āmñiy hā' max 'ihā xix 'āmñiy hā' kummuk 'ihā kamah. 'Āpu hāpkummuk mīy'ax xop pu' yūmmūgā putat max. 'Āpu tikmũ'ün tu' kax, puyīy hāpxopmǎ max. 'Āpu tikmũ'ün yōg hāpxopmǎ max hip mōkuma' mōg. 'Āpu tikmũ'ün pu hāmyūmmūgā mōkuma mōg. <sup>3</sup>Hāpxip 'ihā tikmũ'ün te hāmyūmmūgā xe'e 'āpak putup'ah, pap-tup, nūy hāpxop nōy 'āpax, tu notot xop xak putup punethok, ha ta notot xop te' yūmmūgāp-tup hāpxop nōy nōm hāpxop xohix tikmũ'ün tep-tup, nūy xupax. <sup>4</sup>Tikmũ'ün te hāmyūmmūg xe'e kux putup, nūy hām'aktux hitop 'āpax. <sup>5</sup>Pa 'āmūn, 'āpu 'ōg hāxopmǎ hitop mō'niy mōkuma mōg. 'Āpu' kummuk hā tot. 'Āpu Topa hām'āpak max 'aktux Yeyox yūmmūg 'ohnāg xop pu'. 'Āpu 'ōg hāpxopmǎ nōy xohix mīy, tu mōktu' kux. Yā Topa pu 'āhām.

<sup>6</sup>Ha tak xok putūmnāg. Hāpxip 'ihāg mōg putup. <sup>7</sup>Topa puk hām max, ha' kux. Putat kux ha tak xupep. 'Ūgkuxa yūm kux 'ohnāg. <sup>8</sup>Topa te 'ā' hōm putup 'ūxut xop yōg hāpxop xe'ēgnāg pexkox tu', yā kuxa tupnāg hōm putup yūmūg xuxyā Yeyox Kunnix keppah. Yūmūg xuxyā Yeyox Kunnix te tikmũ'ün yōg hāpxopmǎ'ax kopit putup. Tute 'ā' hōm putup nōm hāptup, 'ihā' nūn, tu' nōy xohix pu' popmāp-tup 'ūkuxa tupnāg kamah, yā Yeyox Kunnix te putpu' nūn putup pax xop pu' popmāp-tup.

### Hā kaxīy 'ūgmūn

<sup>9</sup>Ta Tīmōn, 'āpu hāpxip 'ohnāg 'ihā nū'. <sup>10</sup>Hamūn, Nep te hāmexexka yōg hāpxop max putup pax, huk nīm, tu ta' mōg kōmēn Texanōn tu'. Ha ta' mōg Kenexēn kama hāpxexka Ganax tu', ha ta' mōg Tit hāpxexka Namāy tu'. <sup>11</sup>Ta Nok puxehnāg xip 'ūgmūtik. Mōy, Mā'ak xak, nūy nūnnā', pu tu hām 'ūgmūtik. 'Ūhām max. <sup>12</sup>Ta 'āte Tikik mō'kutnāhā kōmēn 'Ep tu'. <sup>13</sup>Ānūn, nūy paxnū' yōg kayak. 'Āte nōm nīm hāpxexka Tonot tu' Kap pet tu'. 'Āpu tappetxax paxnū kama xix tappet nōy.

<sup>14</sup>Ha ta 'Anexān tek kummukgā xexka', yā pipkup hā' hām 'Anexān. Yūmūg xuxyā Yeyox te 'ūyōg hāpkummuk mīy'ax yānān putup. <sup>15</sup>Paxip tik tu nō'ōm. Tute yūmū yōg hām'aktux mūtik yāy kix pax.

<sup>16</sup>Ha ta hōmā gohet yōg tik pa te hāmyūmmūg te yōg hāpxopmǎ'ax kopit hāmāxap, 'ihā tikmũ'ün pip 'ohnāg 'ūgmūtik. 'Āte-tup'ah, puyīy Topa nōm tikmũ'ün yōg kummuk mīy'ax yānān. <sup>17</sup>Pa yūmūg xuxyā Yeyox xip 'ūgmūtik, tuk ka'ogāhā', 'ūyīy Topa yōg hām'āpak max xohix 'aktux, puyīy puknōg xop hām'āpak max 'āpax. Yā yūmūg xuxyā Yeyox tek xut hāmgāy

yīkox kopa putuk. <sup>18</sup>Yūmūg xuxyã Yeyox tek xut putup hãpkummuk xohix kopah kamah, tuk mōgãp-tup pexkox tu'. Yã 'õnte yūmūg xuxyã Yeyox te' xat putup yãy yōg tikmũ'ün. Yã' max xe'ëgnãg mōkuma' mōg. Hamün.

**'Ātep-tup, pu Topa nox xhip 'āxop mütik**

<sup>19</sup>'Āpu Pinixit pu hãm'ãktux xix 'Ak pu xix 'Õnëxip xuxyã xop pu'. 'Āte nōm xaxok 'ohnãg. <sup>20</sup>Ha ta 'Enax nox xip kōmën Konĩn tu'. Ha ta 'ãte Tonop pi' komën Mīnet tu'. Yã' pakut. <sup>21</sup>Ta 'ãpu nũ' mōg'ãgmūg 'āxix hãmmũmũ'. Ta 'Eop te xa' hãm'ãktux xix Pononën te', xix Nĩn te' xix Kanap te' xix Kunnix kopa kuxa mãm xop xohix xexka te hãm'ãktux, 'āxop xaxok 'ohnãg.

<sup>22</sup>'Ātep-tup, pu Topa nox xhip 'ākokuk mütik. 'Ātep-tup, pu Topa xa hãmmxnã'. Tu ta tu' kux.